



Odgoj muslimana prema smjernicama Kur’ana (Medina)

Hatib: dr. Husejn ibn Abdulaziz Alu Šejh

2. džumadel-ula 1447. po Hidžri / 24. oktobar 2025.

Hvala Allahu, Onome Koji je opisan svojstvima ljepote, savršenstva i veličanstvenosti. Njegova su imena najljepša, Njegove osobine najpotpunije, a Njegova djela najjasnija i najmudrija. Svjedočim da nema boga osim Allaha, Jedinog, Koji nema sudruga, i svjedočim da je naš vjerovjesnik Muhammed, sallallahu alejhi ve sellem, Njegov rob i Njegov poslanik. Allahu, smiluj se, blagoslovi i spasi njega, njegovu porodicu i ashabe.

O muslimani, bojte se Allaha i pokoravajte Mu se. Uzvišeni kaže: “...i bojte se Allaha, jer Allah strašno kažnjava” (El-Maida, 2); “...i bojte se Allaha, jer Allah, zaista, brzo sviđa račune”(El-Maida, 4).

Poštovani vjernici, najkorisnije i najčasnije znanje jeste znanje o Allahovim lijepim imenima, koja ukazuju na najuzvišenija značenja i najpotpunija, najveličanstvenija i najplemenitija svojstva.

Najuzvišenija stvar koja obasjava srce i čini ljudska prsa prostranim jeste spoznaja Allahovih lijepih imena i savršenih svojstava, iz svjetiljke poslanstva i objave. Onaj ko ih prihvati sa zadovoljstvom i predanošću, ko im se preda, čija duša u njima pronade spokoj, čije se srce s njima smiri, i ko preko njih bude činio ibadet Allahu – taj će povećati svoj iman, veličanje i ljubav prema svome Gospodaru, Uzvišenom i Veličanstvenom.

Srca imaju veliku potrebu da zavole svoga Stvoritelja, da Ga spominju i traže put ka Njemu, a nema puta do toga osim kroz poznavanje Njegovih imena i svojstava, koje su spomenuta u časnom Kur’anu i plemenitom sunnetu. Što više čovjek zna o njima, to bolje poznaje Allaha, više Ga traži i bliži Mu je. Njegova lijepa imena i savršena svojstva ispunjavaju srce veličanjem, pokornošću, poniznošću, strahopoštovanjem





prema Njemu i strahom od Njega, jer nema utočišta od Njega osim kod Njega. Tada rob u svojim potrebama i dovama ne traži nikoga osim Njega, bez obzira ko on bio.

Poštovani vjernici, poznavanje Allahovih lijepih imena ispunjava srce sviješću o Njegovom nadzoru i obaviještenosti o svakom Njegovom pokretu i mirovanju, i vodi roba ka približavanju Allahu kroz žurno izvršavanje Njegovih naredbi i udaljavanje od Njegovih zabrana.

Uzvišeni kaže: “Allah ima najljepša imena.” (El-A’raf, 180)

“Allah, drugog boga osim Njega nema, najljepša imena ima!” (Taha, 8)

Poslanik, sallallahu alejhi ve sellem, rekao je: “Allah ima devedeset devet imena; ko ih obuhvati, ući će u Džennet.” (Muttefekun alejhi)

Riječi “obuhvati ih” znače da ih rob nauči napamet, razumije njihova značenja i implikacije, djeluje u skladu s njima, i da Allahu potvrdi imena i svojstva koja su potvrdili Kur’an i sunnet, onako kako dolikuje Allahovom savršenstvu, bez iskrivljavanja, negiranja, poistovjećivanja ili zamišljanja njihove forme, onako kako to ljudi zamišljaju, jer niko ne zna kako izgleda Allahovo biće i Njegova svojstva, osim On sam. To je znanje koje je Allah zadržao za Sebe, i ne postoji put do njega. Mi potvrđujemo Allahu apsolutno savršenstvo.

Uzvišeni kaže: “Niko nije kao On, a On sve čuje i sve vidi.” (Eš-Šura, 11)

“Znaš li da ime Njegovo ima iko?” (Merjem, 65)

“I niko Mu ravan nije.” (El-Ihlas, 4)

On je Bog Koji je objedinio kod Sebe sva lijepa imena, svojstva savršenstva i ljepote, i osobine veličine i uzvišenosti.

Također, rob treba negirati ono što je negirano u kur’anskim i hadiskim tekstovima, a tiče se Allahovih svojstava, potvrđujući, u isto vrijeme, savršenstvo svojstva koje je u suprotnosti sa onim što je negirao, pa tako negiranje nepravde ukazuje na savršenstvo Njegove pravde, negiranje nemoći ukazuje na savršenstvo Njegovog znanja, moći i uzvišenosti.





O muslimani, neophodno je poznavati Allahova imena, po izgovoru, značenju i implikacijama, i obožavati Ga u skladu s njima, te dozivati Ga njima, bilo u vidu pohvale i ibadeta, bilo u vidu molbe i traženja.

U dovi ibadeta: kada rob zna da je Allah Jaki, Silni i Mudri, oslanja se samo na Njega, traži utočište kod svog Stvoritelja, i ne obraća pažnju na stvorenja. Kada zna da je Allah Onaj Koji prima pokajanje, Milostivi, Onaj Koji prašta, Blagi – žuri ka pokajanju i povratku svome Gospodaru. Kada zna da je Allah Onaj koji sve vidi, sve čuje, Onaj Koji je o svemu obaviješten, to mu ulijeva strah od grijeha i strahopoštovanje prema Njemu.

U dovi traženja: rob doziva Allaha imenom koje odgovara njegovoj potrebi, naprimjer: "O Milostivi, smiluj mi se!", "O Ti koji praštaš, oprosti mi!", "O Ti koji primaš pokajanje, primi moje pokajanje!", "O Opskrbitelju, opskrbi me!"

Zato su dove poslanika najčešće počinjale sa: "Gospodaru naš!", jer uslišavanje dova, davanje onima koji traže i pomoć onima koji traže utočište, sve to spada u Njegov rububijet, koji podrazumijeva da je On Onaj Koji upravlja, ima moć, daje opskrbu, daje i uskraćuje.

On, Uzvišeni, je Bog kojem se jedinom upućuju molbe i od Kojeg se jedino traži pomoć.

Allahu, podari nam korisno znanje i dobra djela, učini nas onima koji upućuju i koji su upućeni, a ne onima koji su zalutali, niti onima koji druge odvede u zabludu.

"Reci: 'Zovite: 'Allah', ili zovite: 'Milostivi', a kako god Ga budete zvali, Njegova su imena najljepša. Ne izgovaraj na sav glas Kur'an kad molitvu obavljaš, a i ne prigušuj ga; traži sredinu između toga.'" (El-Isra, 110)

Allahu, podari nam znanje koje će biti uzrok da budeš zadovoljan s nama. Slavljem neka si Ti, ne možemo Ti dovoljno biti zahvalni, Ti si onakav kako si o Sebi kazao.

O vjernici, bojte se Allaha i pokoravajte Mu se, jer onaj ko se boji Allaha, Allah ga štiti od zla i grijeha u svim stanjima i vremenima.





“KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJE
KOJU TOKOM HUTBE ELABORIRA.” (PREPOROD)

HUTBE 

Povećajte donošenje salavata i selama na plemenitog Poslanika. Allahu, smiluj se, spasi i blagoslovi njega, njegovu porodicu, njegove ashabe i sve one koji ih slijede u dobročinstvu do Sudnjeg dana.

Allahu, nemoj ostaviti nijedan grijeh a da nam ga ne oprostiš, nijednu brigu a da je ne otkloniš, nijednu tjeskobu a da je ne rasteretiš, nijednu poteškoću a da je ne olakšaš, nijednog neprijatelja a da ga ne poraziš i ne zašitiš nas od njegovog zla. Allahu, budi zadovoljan nama i svim muslimanima!

Zatim, znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!” (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

